

水經注正誤舉例

己未仲夏

水經注正誤

吳慶坻題



南	劉	求	齋
林	氏	恕	刊

上海古籍
書店重印

水經注正誤舉例序

古者職志方輿從簡略惟酈氏水經注分條析縷引
委求源千載以來士林崇尚顧文字繁濫失實遂滋援
古證今動虞柄鑿於是或尊同墳典取備一家或采掇
腴詞聊充千腋其篤嗜者就文箋義不問地形偶辨譌
淆仍囿科臼有功前哲無補新知讀未終篇神迷目眩
金人蔡正甫撰補正水經三卷久已失傳吾郡沈繹旃
炳巽有集釋訂訛之作郡縣沿革悉注今名歲月緜瓠

竟亡舊槧常熟黃子鴻

儀

江甯汪梅村

士鐸

宜都楊惺

吾

守敬

先後撰水經注圖黃作失傳汪氏以考證班志

爲主附訂正酈注祇十二條楊圖則古墨今硃複印一
紙恪遵師說罔敢稍違是固近代鴻篇而猶依傍步趨
罕抒心得者也仁和丁益甫先生實事求是年老益劬
曩讀所著蓬萊軒輿地叢書創解殊多久深嚮往近又
得其水經注正誤舉例五卷依可恃之山谿去陳言之
影響析衷宜確攻訐無嫌武斷見疑苦心可諒試就酈
氏原文探索實有牴牾難通乖於地勢之處今前後互
易便合真形俾讀者知若者可疑若者可信若者爲後
人竄入稽古弗泥治絲不紛淵奧之書豁然開朗爲鄭
氏諍臣卽爲酈氏知己矣惜全書未竟圖繪闕如然所

糾繩如漸江穀水諸節之顛倒及溫存浪潭八水之繆
轉爬梳抉剔異義特標會稽童亦韓大令慇懃付梓因
爲審正斂誤壽之棗梨間有可商者方將折簡詳詢而
先生修文遽赴無由析疑當世輿地家誠欲殫見洽聞
甄名核實則此書別樹一幟力埽訛談正可互證是非
藉窺涯涘百川纏絡一覽瞭然未始非初學津梁宿儒
攷錯之具也庚申花朝吳興劉承幹序

小引

水經注一書地學家與班志並尊視同聖經賢傳不敢稍參私議今儼然爲之正誤知見者必謂爲狂嚙無疑竊思地理者徵實之學水與山之位置皆造物者豫爲排定豈人力所能意爲更張此書注釋校箋自明後已三十餘家碩彥鴻儒均畢生盡力於此所不解者諸公矻矻類於故紙中講求水道絕不於實地上探尋水道以故作者愈眾謬戾愈多每取其書與輿圖合讀輒瞢然如墮雲霧思欲仿董方立殘藁遺意以今地爲主證明而疏通之凡遇顛倒錯雜諸條不得不謂之誤非

故意訐擊也惟卷帙繁重又迫桑榆晚景詎敢必其有成故握筆而中止者屢矣茲始決然爲之余浙人也特草漸江篇以啟其端姑盡其力所能爲卽弗成後人可推其意以爲賡續因目爲舉例云至說之當否仍俟海內地學家之論定焉乙卯孟夏七十三老人丁謙識

水經注正誤舉例卷一

求恕齋叢書

仁和丁謙纂述

吳興劉承幹參校

漸江水

漸江水出三天子都北過餘杭東入於海

此段水經原文

三天子都見於山海經及郭璞注者凡三一爲浙江所出一爲廬江所出一則混言南海之內今安徽績

谿縣東南有大鄣山當卽水經所指

郭注作三天子都云在新安歙

縣東太平寰宇記

入浙水出處若廬江遠在彭澤

西又一三天子都不詳所在均與浙江無涉明甚然

績谿處餘杭正西當云東過不當云北過必如顧野王之說謂今永康晉雲山是三天子都方向始合且凡記諸大水例必取最遠之一支爲正源然後敘述全水貫串無忤浙江之水大源有四三在南一在北流行道里不甚相懸於中擇其較遠者自當以仙霞嶺水爲正源況浙江大段皆由南而北後乃迤東以入海如是水自閩界北行經江山北與北來之馬金嶺水合遂名穀水乃折東行歷龍游湯谿縣北至蘭谿縣境與東來之婺水合又折而北至建德縣境方與新安江水合茲以新安江爲正源已非順序之義

而績谿之水較之休寧婺源兩界所出之率水來源
之長短亦異酈注本漢地志主率水總之水經記漸
不取三天子都說以此江水僅此三語三語中又不倫不類惟有存而弗論
而已

酈善長注云山海經謂之浙江地理志水出丹陽黟縣
南蠻夷中北逕其縣南浙江又北歷黟山

此水出今休寧西南界率山名曰率水北流轉東經
休寧縣南蓋休祁等縣當時皆黟縣境也因水源出
處漢時皆爲山越所據不知其名故地理志僅混稱
蠻夷中

浙江又北逕歙縣東與一小谿合水出縣東北翁山西逕故城南又西南入浙江

歙東小谿卽三天子都所出水翁山卽大鄣山此谿今名登水所謂故城當在臨谿鎮地故又西南入浙江

又東逕遂安縣南

當作始新

谿廣二百步上立杭以相通浙

江又左合絕谿谿水出始新縣西

始新當作新定

東逕縣故城

南爲東西長谿谿有四十七瀨谿水東注浙江

按新安江自入浙境但經淳安縣南不經遂安縣考淳安地三國吳時置始新縣并於縣置新都郡晉初

改新安郡絕谿卽武強谿出遂安縣西界東流迤北
經遂安城又東北入新安江所謂東西長谿也遂安
吳時置新定縣晉初改遂安

浙江又東北逕建德縣南穀水入焉水源西出太末縣
其水飛湍北注至縣南門入穀水

按原文自逕建德縣南以下顛倒錯亂全無次序茲
據目前水道細爲理董方有支派可尋穀水今衢州
港源出閩界之仙霞山北流經江山縣至西安縣西
入衢港當時皆太末地也其水飛湍北注兩句原在
永康谿水下攷永康縣西南雖有北注之水但所入

非穀亦不在南門且不應舍浙江正源敘茲小谿之
理故移置於此惟南門門字或是衍文

穀水又東定陽谿水注之水上承信安之蘇姥布水懸
百餘丈瀨勢飛注狀如瀑布其水分納眾流混波東逝
逕定陽縣谿水又東入於穀水

定陽谿水卽西安縣南之烏谿漢末於西安地置定
陽縣故曰定陽谿水在江山東北與衢港合信安今
常山縣衢港上承之水出開化縣北馬金嶺當時亦
信安境此水南流經開化常山折東以入西安

谿水

當作穀水

又東逕長山縣北與永康谿水合谿水南出

永康縣逕長山縣南與吳寧谿水合水出吳寧縣下逕
烏傷縣謂之烏傷谿水谿水又西原作穀水
又東誤逕烏傷縣
之黃雲山入穀水

晉長山卽今金華縣金華谿水今稱婺江是時尚無
婺州之名當以吳寧谿代表婺江以水源較永康谿
長也吳寧卽東陽縣水出縣東與嵎縣交界之白峰
嶺西流經義烏古曰烏傷縣又西至金華縣南與永
康谿合水南出縉雲境北流迤東經永康武義二縣
合東陽谿爲婺江又西北至蘭谿縣南大雲山卽黃
雲山
蘭谿古
烏傷地入於穀水○按穀水東流婺江西注穀水無

東入婺境之理而婺境水亦不得通稱穀水原文多誤

穀水又東

當作又北

入錢唐

當作建德

縣而左入浙江

穀水東至蘭谿合婺江後卽折而北與新安江會自是更無穀水名稱則錢唐爲建德之誤毫無疑義

浙江又東逕壽昌

當作桐廬

縣南自建德至此八十里中有

十二瀨瀨皆峻險行旅所難

此段敘七里瀧故有峻險之十二瀨其地正在建德之北桐廬之南與壽昌無涉蓋壽昌僻在建德西南但有山谿非大江所能經也

浙江又北逕新城縣

亦當作桐廬

桐谿水注之水出吳興郡

於潛縣北天目山南流逕縣西爲縣西谿谿水又東南與紫谿合水出百丈山東南逕桐廬縣爲桐谿入浙江按桐谿水由桐廬入江並不經新城縣攷桐廬於孫吳時分富春之桐谿鄉置縣與新城無涉不知何以致誤天目山有二均在於潛縣境此水係出西天目山西谿今日虞谿紫谿所出百丈山在今昌化縣西北桐谿又東南經今分水縣以入桐廬此不言者分水唐置當時俱隸桐廬也入浙江三字原文在後逕新城縣下係誤今刪彼移此